

Protagoniscj i zovins, tra Friûl, New York, Parîs, Los Angeles

Fieste de Patrie: un gnûf video al conte i furlans tal mont

Par celebrâ la Fieste de Patrie dal Friûl, ai 3 di Avrîl, la Agenzie Regionâl pe Lenghe Furlane - ARLeF e memoree ducj i furlans cuntun gnûf video che al mostre la vite di ogni dì, soredut di zovins furlans che si cjatin a vivi lontan de lôr tiere di divignince, ma che dut cês a restin simpri leâts a jê in maniere fuarte. «Un video curt e penç - al à marcât il president de ARLeF, **Eros Cisilino** - che al fâs viodi ben la impuartance des lidris, de storie e des relazions familiârs. Ancje se lontans, i protagoniscj a son dongje cul cûr al Friûl, e chest leam al è rapresentât in maniere autentiche propit de bandiere de Patrie». No a cês, la frase che e siere il filmât e dîs: «In ogni bande dal mont, la nestre acule nus ten simpri dongje».



In mancûl di doi minûts, il video, pe regjie di **Giorgio Milocco** (Quasar), nus puarte intun vèr zir dal mont:

Udin, New York, Parîs, Los Angeles e po dopo di gnûf in Friûl, cu lis sôs monts maraveosis.

Il fil ros che al mene di un puest a chel altri e je Jê, la bandiere dal Friûl, simbul distintîf di ceste tiere.

«Ancje chest an o fasarìn la Fieste de Patrie dal Friûl in modalitât “virtuâl” - al dîs **Cisilino** -. Cun chest video, o vin duncje decidût di fâ un regâl a ducj i furlans, che o invidìn a meti fûr lis bandieris ai 3 di Avrîl che al ven».

Il video al è disponibil sul sît internet e sul canal YouTube de ARLeF.

Bandiere dal Friûl, la setime plui antighe in Europe

Lis origjins de bandiere a rimontin ai timps dal Stât patriarcjâl, che al guviernà il Friûl dal 1077 al 1420 e che al istituì un dai prins parlaments in Europe (e la Fieste si riferis propit ae istituzion di chel Stât, ai 3 di Avrîl dal 1077). L'esemplâr plui cognossût e antic dal standart (secul XIV) si pues amirâ inmò vuê intal museu dal domo di Udin.



Ghiti: il sît bilengâl che “al ghitie” la curiositât dai fruts

Al è nassût de colaborazion tra ARLeF e Ensoul, aziende di Udin specializade in sîts internet, Ghiti: il gnûf portâl bilengâl, indreçât ai fruts dai 3 ai 10 agns.

«O sin pardabon braurôs di ceste prime plateforme par furlan dedicate dal dut ai plui piçui e ai lôr gjenitôrs.», al à marcât il president de ARLeF, **Eros Cisilino**, presentant il projet adun cun **Fulvio Romanin**, titulâr di Ensoul, e l'Assessôr regjonâl ae istruzion, **Alessia Rosolen** che, fevelant des dificolitât leadis ae



emergence pandemiche, e à marcât cemût che «il sît al devente un strument di supuart pai mestris, pes fameis e pai fruts». La interface e je semplice, imediade e

intuitive e e stice la curiositât cun interazions e sunôrs. Cjapitul separât al è chel de acessibilitât: il portâl al è disvilupât daûr di principis cromatics e tipografics inclusifs; al è acessibil a utents cun disabilitâts tant che il daltonisim e la dislessie; cun di plui al è dotât di audio. Al dopre tecnologjiis pensadis prin di dut pal telefonut e pal tablet:

«O vin lavorât cun cetante atenzion sui aspiets pedagogjics - al à dit **Romanin** -, dant un tai al pas cui timps e fûr dai schemis». www.ghiti.it